

егемен Азатстан

Даланың дара дүлдүлі

Қазақ халқы өз мәдениет тарихында ұлы оқиғалар мен әйгілі есімдерді, тарихи тұлғаларды ешқашан естен шығарған емес. Олар жайлы ел аузында аңыз-әңгімелер, көптеген деректер қалып отырған. Өмір шындығын, қоғам шындығын айқын танытуда көркем әдебиеттің орны айрықша. Тарихи тақырыпта ой қозғап, қазақ елінің, қазақ ұлтының әр ғасырда әрқиыттық тағдыр кешкен ақтандақ, біртуар тұлғалардың ел тарихындағы орнына баға берген, олардың құрделі бейнесін көркемдік тұрғыдан жинақтаған қаламгерлер қазақ прозасы мен поэзиясын жаңа қырынан танытты.



Көркем шығармаларға өзек болған сондай тұлғалардың бірегейі – Иманжұсіп Құтпанұлы

(1863-1931). Көрнекті жазушы Әбіш Кекілбаев: «Иманжұсіп – көз жетер жердегі аса бір әйгілі де асқақ тұлға. Ол бүтін болмысымен аса зерделі суреткер, композитор, ұлы әнші-сазгер. Өзінің бітім табиғаты бойынша – нағыз дала қекжалы. Ол мұлде қайталанбас, қатардағы екінің бірінің қолынан келе бермейтін ерлікке барып, адамдардың жүргегінен күні бүгінге дейін кептейтін аңызға айналды. Ол өзінің адамгершілік айбынымен, кез келген астамшылық, ұstemдікке бас ұрмайтын мінезімен, қалың әлеуметке тізесі батқан кесір-кесапат атаулының қандайына да қасқайып қарсы шығатын қасиетімен әлі талай келер ұрпақтың өкілдерін тамсантатын болады», – деп баға берген Иманжұсіптің кім екенін, шығармашылық мұрасын, дүниетанымын түсіну үшін оның өмір жолына, заманының хал-ахуалына, жүрген ортасына назар аударған жөн.

«Жұз қатыны қазақтың ұл тапса да,
Бәрібір Иманжұсіп бола алмайды!»

– дегендей, ол халқым деп өмір сүрген, ел-жұрттын рухани бесікте тербету үшін жаралған сегіз қырлы, бір сырлы сері, дарын иесі. Тағы бірде Әбіш Кекілбаев Иманжұсіптің талантына бас ие отырып: «...Бір өкінішті жай сол, осындай айрықша бітімді ерекше тұлға біздің әдебиетімізде, өнерде өзінің лайықты, көркем бейнесін тауып, тарихшыларымыздың әділ бағасын ала алмай келеді», десе, академик Ахмет Жұбанов: «Иманжұсіптің бар тарихы архивте жатыр. Әлбетте, көп сөз ел ішінде әлі бар. Соларды жинау керек. Иманжұсіптің де күні туады әлі», деп көрегендік танытады.

Қазақ тарихы мен өнерінің бастау қайнарында тұрған сал-серілердің, ірі талант иелерінің бәріне ортақ қасиет – көп қырлылық. Балуан Шолақ, Ақан сері, Жаяу Мұса, Үкілі Үбырай сынды өр мінезді өнер саңлақтарының Иманжұсіп өмірі мен өнерінде сабактастық, үндестік байқалады. Осы тұлғаларға қатысты жазылған шығармалар соның айғағы.

Иманжұсіпке қатысты көптеген ғылыми мақалалар мен зерттеу еңбектерінің авторы Оразбек Сәрсенбай былай дейді: «Саналы ғұмырында тағдырдың теперішін көп көрген Иманжұсіп курескерлік өр үнін әндерінде танытады. Еркін жарық дүниені көруге зар болған Иманжұсіп сонда:

«Күнім қайда баяғы таңдай атқан,
Қараөткелдің көшесін дабырлатқан.
Бидайықтай ілуші ем аққу, қазды,

Жарғанат болғаным ба бұғып жатқан?» – деп, ...сұрапыл қайрат иесі Иманжұсіп зорлықшылардың өзіне күш көрсетуден тайынбаған. Мұрағат деректерінде оны жөнге салуға келгендердің талайы оңбай таяқ жеп, жарақаттанғаны айттылады. Оны ноян серінің өзі де жасырмайды.

Тумай жатып өш болды маған болыс,
Аударылды сол үшін талай қоныс.
Сатырлатып сабаушы ем, шеттерінен,

Мынау ояз демеуші ем, мынау болыс!..».

Иманжұсіп өмірінің, қайсар ерлігі мен тума талантының ең тартымды да тағылымды тобы поэзиялық жанрдағы көркем шығармаларда жасалған. Өлең, арнау, поэма үлгісінде жазылған шығармаларда Иманжұсіп Құтпанұлының алуан түрлі қасиеттері, ол өмір сүрген заман шындығы қамтылады. Оларды тұтастай алғанда, Иманжұсіп өмірінің көркем шежіресі деп сипаттауға болады. Батырдың шежіресін тарататын сондай шығармалардың бірі – Мәнсүр Бекежановтың «Иманжұсіпке хат» дастаны.

Сегіз қырлы, бір сырлы өнер тарланы Жаяу Мұса Иманжұсіппен дос болған, оған өлең де арнаған.

Бүтінгі ақын Мұзафар Әлімбаев та «Қайсар» атты поэмасына желі етіп Иманжұсіп өмірін алған.

Ал дара дарын Кеңшілік Мырзабеков «Иманжұсіп» поэмасында оны батырлық қырынан танытады. Бір шумағын оқып көрелік:

«Тік қарап, тұра қарап, тік сөйлеген,

Жан емес бүгежектеп, бүкшеңдеген.

Даланың серісі еді білмейтүғын,

Не нәрсе басына іс түсті деген», деп келетін төрт жолда жанды сурет мемлұндалап тұр.

Құрескер тұлғаға арналған жырлардың да шоқтығы биік. Бұл сөзімізге дәлел – Ғалым Жайлайбайдың «Қараөткелдің бауырында қалың шұбар» атты өлеңі. Сол секілді Қасымхан Бегімановтің «Ақын ағаға сыры» Иманжұсіп рухымен тілдестіреді.

Қазіргі қазақ поэзиясының көрнекті өкілдерінің бірі – Серік Тұрғынбектің «Иманжұсіптің монологы» – Иманжұсіпке арналған өлеңдердің ішіндегі бірегейі. Монолог үлгісінде жазылған. Қазақ тарихындағы шоқтығы биік тұлға бейнесін сөзбен сомдайды. Сәкен Сейфуллин мен Иманжұсіп Құтпанұлының арасында болған достық, сыйластықты:

«Тұп-түгел ауылның мал мен басы,

Бар ептең баяғыдан қалған кәсіп.

Дүниені дүрліктірғен

Сол Имекен

Бұл күнде Сейфолланың жан жолдасы», – деп ой өрбітеді. Көкшелік ақын, манасшы жыршы Баянғали Әлімжановтың «Балуан Шолақ пен Иманжұсіп» өлеңі К.Мырзабековтің «Иманжұсіп» поэмасы, С.Тұрғынбектің «Сәкен мен Иманжұсіп» атты туындыларымен үндес шығарма. «Азаттығын алтынға айыrbастамайтын Ерейменнің еренінің» батырлығы жайлы ой толғай отырып, «жақсылықты жақтырған, жамандықты жат қылған», ерлігі асқан Балуан Шолақ пен «бетпе-бет келгенде аттан жұлыш алыш, жыраға бүктең-бүктең бір-ақ тыққан» Иманжұсіп батырдың кездесуі жайлы сөз етеді.

Көрнекті қоғам қайраткері, жазушы Шерхан Мұртаза: «Жалған дүниеден із-түzsіz кеткен жаман. Өмірде қанша зор болсаң да, артыңда іздерің, сұрапың қалмаса қор боласың. Иманжүсіп – Балуан Шолақ, Қажымұқан есімдерімен қатар тұратын қасиетті халық мақтานышы. Ұлт намысының үлгісі. Қазіргі, бізден кейінгі үрпақ бұл есімдерді ардақтай білсе, халқымыздың мереjі өсе түспек. Ел үшін, теңдік үшін, бостандық үшін жанпида болған ерлер алдында халық қарыздар. Оның өтемі: ерлер есімін өшірмеу», деп баға берген батыр есімінің қазақ әдебиеті мен мәдениеті тарихындағы орны ерекше. Дара тұлғалардың есімін әйгілеп, асқақтату, насиҳаттау – үрпақтық парыз.

Иманжүсіп бойынан батырларға тәn қасиеттерді танып білеміз. Елінің бүтіндігі, тыныштығы мен тәуелсіздігі үшін, әділеттілік үшін шайқасқан. Қазір біз тәуелсіздіктің ақ таңында бейбіт күн кешіп жатырмыз. Ол үшін Иманжүсіптеі аруақты ерлер мен батыр бабаларымызға қарыздармыз. Жас буын, бүгінгі жастар Иманжүсіптеі сегіз қырлы, біr сырлы қасиетті біr бойына сіңіріп өссе, ел тәуелсіздігі мен ұлт айбыны асқақтай түсепі сөзсіз.

Иманжүсіп Құтпанұлы – қазақ халқының бостандық алуы жолында өзіндік үлес қосқан азамат. Оның келер үрпаққа қалдырған мұрасы да жетерлік. Тек оны әлде де зерттей тұсу қажет. Жас үрпақ осынау тұлғаны пір тұтып, өмірлік идеалына айналдырса, қазақ деген халықтың өсер тұғыры содан бастау алуға тиіс. Ел-жұртының азаттығы мен тәуелсіздігі үшін өмірін қиған «нағыз дала көкжалы» Иманжүсіп Құтпанұлына қатысты телегей-теніз мәселені толығымен зерттеп, игеру, жас буын өкілдеріне насиҳаттау – алдағы күннің еншісінде.

Раушан КӨШЕНОВА